

# 1 Pita

## Teik pasi Pita hani teka kahikahi

## Jises Krais

### Kakain ti haxewai teik pepa ie

Pita tel aposel tai teik pas ie hani teka kahikahi Krais ti tesol tesol lokon ti i toto tehu taon Rom. I sohot sai 34 ahang muhin ti Jises moih aliawa ape Haeu waxi i hani tesol tonan. Teka kahikahi Krais tunahi kawatan tenen tenen hahitake teka masiwi ti Rom nake lato usiusi saun ti Jises Krais. Aile ape Pita kak hahakui lato lehe lato tu xox tatale ti Krais hetekie amuam. I kakaxi hani lato sale Krais i awai lato, xoxoi namili Krais kalak kawatan tunahi i ma sale aliaian. Pahan lato nameni konginiwa tesol waliko ien ma haxoxoa namilolato ti Krais. Tin i hone lato woulato kolawa ka lato se nati Haeu.

<sup>1</sup> Teik pas ie tataiak nga Pita, tel aposel ti Jises Krais.

Nga tai hani amuto teka seilon Haeu kilamiwen tetan, teteke amuto ti xux liai to sisilahota leili xux Pontus, Galasia, Kapadosia, Asia ma Bitinia.

<sup>2</sup> Ti imat wanen hoi tel Tamakako Haeu namiloi-wen ka i kilami amuto seilon tetan. Holi Spirit aile, ape amuto hani hatapo Haeu tupuamuto. Aile ape Jises Krais nuhi hauni amuto ti lialui woumuto nake i mat hualiamuto. Ape amuto pon usiae kakaian.

Nga kamei Haeu aile kola hawanei lalape soliaian hani amuto hetekie hatona hasoliai tiamuto.

*Teka kahikahi Krais mon atetengi tonain kapi  
Haeu ti tap tahi tapoan*

<sup>3</sup> Kako haxawawa axe Haeu, tel Tame Jises Krais tel Masiwi ti kako. Ti lalape tatahan tetan i aile, ape kako sohot seilon haun ti usiai nenein tetan. Haeu xahateni Jises Krais ti matean, aile ape namilokako i xox hawane ti mon atengiai tonain kapin ti tap tahi tapoan.

<sup>4</sup> Nake ti tenen ien, kako soh hawane ka kako uke kahukako ti i to aununa tone Haeu. Tesol waliko ien tap tahi kalutaian ma lialuan. Lawe i hamalum kapita haun ma solian.

<sup>5</sup> Waliko ien tetakako, teteka seilon namilokako xoxoan tetan. Aile ape ti lalape pohe Haeu i awawai kako atengi tataen ti Jises Krais aliama. Taen ien Haeu oxoxi hatapo kako ti lawe waliko lialun ape i hatakei hani kako lawe waliko ti i aunini tetakako.

<sup>6</sup> Aile ape amuamua, kalak aope ie kako ilalameni moloan ti totohong ma kawatan tenen tenen leili teik taun kukunun.

<sup>7</sup> Tesol kawatan ien i kola na namilokako xoxoan ti Haeu ma na kumahe, masin ti laha lui gol he ah ti haunian lehe i kola ka i se gol wanen. Gol pon i lialu tuahe namilokako ti Haeu i xox tatale na kako waxaini tesol totohong ma kawatan ien. Na i sohot ukek ien, Haeu namiloi ukek kako seilon tuah ma i sameni kako taen ti Jises Krais aliama.

<sup>8</sup> Saka amuto waheni Jises Krais, kalak amuto tai ningahi i. Tin amuto soh tetan, kalak aope ie amuto kum ninginah i. Amuam lalap wanen leili ti amuto.

**9** Haeu awawai amuto ti kawatan ti lialui woumuto nake namilomuto xoxoan ti Jises Krais.

**10** Teka kuluiai kakai Haeu ti imat laha eliel hawane upia matalainiai ti sale Haeu awai kako. Laha kakaxi ka Haeu aile ukek ien ti lalape soliaian kumahe nake ti soliai puasakako.

**11** Laha eliel hawane tioi aluiniai tesol waliko ien ti Spirit ti Krais hanamiloa laha kak kilamiai lalape moloan ma matei Krais hetekie lawe waliko pate solian muhin.

**12** Holi Spirit haxewa haniwen laha ka kakain ti laha kak kukului, kumahe ti huali aliakealaha tuahe ti hualiamuto. Ti aope ie hina seilon tin laha kaxi ahuti hahani amuto tenen kakain ien ti pohe Holi Spirit, tetel Haeu taloma. Kalak teka engel ti Haeu tin pahalato wanen tioi matalainiai sohotui tesol waliko ien.

### *Haeu pahan kako sohot seilon pate sawisawin*

**13** Aile ape awaiwa namilomuto lehe i kum kapiti halialu nanahiamuto. Haxoxoa namilomuto ukei lawe waliko solian ti Haeu hani amuto ukean taen ti Jises Krais aliamma.

**14** Amuto se nati Haeu ti hong usiai kakaian. Aile ape kum usiusi isiamuto ti ailei saun lialun masin ti amuto ailemu lokon ti amuto tai tioi Haeu.

**15** Haeu i sawisawin tapein. Pahan wanen amuto hana hatapoa tupuamuto hahitake nenein tetan lehe waxi amuto sohot seilon tenen pate sawisawin.

**16** Puki i kakawen leili teik pepaun i ukek, “Sohot elielwa seilon tenen sawisawin tapein nake nga tel sawisawin tapein.” *(Lev 11:44-45)*

### *Kahi lialui woukako pate lalap wanen*

<sup>17</sup> Amuto axai Haeu Tamamuto, aile ape nameniwa ka tehu pon itan ie kumahe xuxumuto wanen. Aile kolawa ka amuto hong tamani kakaian nake amuto paxai tioi ka i tel Masiwi ti amuto ma i kum nexi seilon na i paxai kolongeni woukaha.

<sup>18</sup> Amuto tioi ka Haeu tai hapuasa waliko tenen aneso i tapo masin moni kahui oxoxiakako ti hahitake saun tenen tap pupuasan, tetenen i koutama ti teka matahaun.

<sup>19</sup> Puki Jises Krais i mat kahuiai lialui woukako kalak i sawisawin tapein. I tap wanen teik waliko lialun masin tok sipsip wawan uluha pate huliwi ti teka Ju telei ape hani Haeu.

<sup>20</sup> Imat ti Haeu tanomi lawe waliko, hoi i kilamiwen Krais ti ailei tenen puasain ien. Tuahe ti solian ti kaha, Haeu taloma i aope ie, imat ti tapoi tehu pon itan ie.

<sup>21</sup> Amuto soh ti Haeu nake ti pupuase Jises Krais. Haeu tetel i xahateni Krais ti matean ma hani i ax lalap. Aile ape amuto hina namil xoxoan ti Haeu ma amuto mon atetengi ukei waliko ti i kakawen i hani teka seilon tetan.

<sup>22</sup> Amuto ape haun ti lialui woumuto nake amuto hong usiusi kakain salan ti Haeu ma amuto hina wanen wawahen hani teka akikimuto ti Krais. Aile ape he wawahenawa ti leili atemuto.

<sup>23</sup> Aile kewak ien nake amuto ape nati Haeu. I hani amuto tonain haun ti tap tahi tapoan nake amuto soh kakaian ti i hamalum lian tehue. Kumahe masin totone teka laha kum nam waxi Haeu.

<sup>24</sup> Masin ti tel kuluiai kakai Haeu kakawen, “Seilon masin pahoah i mat kosea.

Lawe waliko solian ti laha i tapo  
hanowi palawa tenen i tuhuawen.  
Pahoah lawe i aiol, palawa i pingox.

**25** Tuahé kakai Haeu tel Masiwi tap tahi  
tapoan.” *(Isa 40:6-8)*

Kakain ien se tenen meng solian ti teka akikimuto  
ti Krais kaxi hahani amuto.

## 2

**1** Amuto ape pate haun, aile ape kum aile ha-halialu seilon, kum pupuluti laha, kum namiloi wawatakai seilon ti laha xoini amuto, kum kak sasaxuti seilon ma kum ukeke seilon tenen lehon huoka. Lioi xaxaweni hatapoa tesol saun ien.

**2** Masin ti akaik tenen pate kokol i hitoloke hawane sus, amuto hitolokewa kakain salan ti Haeu lehe amuto pakata tatale kapin ma amuto tu xox usiai Jises Krais.

**3** Aile kewak ien pake amuto ilameni paxaiwen solian ti Haeu tel Masiwi.

### *Kako ape nati Haeu nake kako soh ti Jises Krais*

**4** Amuto pakatawen kapi Jises Krais, tetel masin tehu kuku pate tuah ti Ingi Haeu. Teka seilon tale tehitolaha hani i tuahe Haeu namiloi ukek i pate tuah ma tin i kilami i ailei puasan.

**5** Amuto tin masin tehu kuku tuah Haeu ha-puasa ataiai tehu ingan. Tehu ingan ien se kako teka kahikahi Krais. Haeu aile ukek ien lehe waxi kako sohot seilon tenen i hani hatapo Haeu tupuan. Haeu amuke tenen saun ien kumahe nake ti soliai puasakako tuahe nake ti pupuase Jises Krais.

**6** Masin ti Haeu kakawen leili teik pepaun. I ukek,

“Nga hatuhi tehu kuku pate tuah leili Jerusalem.  
Tehu kuku ien nga kilamiwen ataiai ingak.

Teka seilon laha soh tetan  
tap wanen laha po namiloi tahane aliake.”  
*(Isa 28:16)*

**7** Aile ape teka laha soh tetan, laha paxai tioi ka tehu kuku ien se pate tuah wanen. Tuahe teka laha kum soh tetan, teik kakain leili pepai Haeu i kak ukek sale teka ien,

“Tehu kuku teka ataiai ing hilisa,  
Haeu aile ape i sohot kuku  
tetehu pamu tuah ti kuku liai.” *(Ps 118:22)*

**8** Leili pepai Haeu tin i ukek,  
“Tehu kuku ien tin masin tehu hat he aweisal  
seilon nahih tuhuke ape laha put.” *(Isa 8:14)*

Teka seilon ien namilolaha ti Jises Krais i put nake laha tahi kakai Haeu. Ti imat wanen Haeu namiloiwen tenen waliko ien i sohot hani teka laha kum hong usi kakaian.

**9** Tuahe amuto kumahe masin teka seilon ien. Haeu kilamiwen amuto seilon tetan. Amuto seilon sawisawin ti ailei puase Haeu, amuto hana hatapo tupuamuto hani i tel Masiwi ti amuto. Amuto seilon ti Haeu lehe amuto kaxi ahuti hani teka seilon lalape solian tetan, tetel i neini ahuti amuto leili tilokoan ti saun lialun hani leili soliai xewaijan.

**10** Masin ti tel kuluiai kakai Haeu kakawen ka imat amuto kumahe seilon ti Haeu tuahe ti aope ie amuto ape nati Haeu. Imat Haeu tai kola tatahan hani amuto tuahe ti aope ie amuto kewen tatahan tetan.

**11** Teka soliai akikik ti Krais, nameniwa ka tehu pon itan ie kumahe xuxumuto wanen. Aile ape amuto tahiwa isiamuto ti ailei saun lialun nake i pahoxai amuto ti ailei saun solian.

**12** Lawe ailewa waliko tenen mewenae sawi-sawin. Na amuto aile ukek ien, teka laha kum soh ti Haeu ma kak sasaxuti amuto, laha paxai tioi soliai woumuto ape laha haxawa axe Haeu taen ti Jises aliamma ti hinitiai seilon.

### *Lawe hongoa kakai teka masiwi ti amuto*

**13** Haeu tel Masiwi pahan amuto paxai tioiwa ka amuto hahitake masiwi tenen tenen ti tehu pon itan ie.

**14** Amuto hongoa kakai tel masiwi tapein ti xuxumuto ma teteka masiwi ti i kilami. I talo laha axiai kawatan hani teka ailei waliko lialun ma sameniae teka ailei waliko solian.

**15** Haeu pahan amuto ailewa saun solian lehe seilon tenen tap namilolaha ma anesoalaha ti Haeu, laha monga kak halialuamuto.

**16** Nameniwa, amuto ape seilon tenen oxoxain, tuahe kumahe i hakouke amuto ailei lawe waliko ti pahamuto. Woumuto kolawa ka amuto unaui Haeu.

**17** Waheniwa teka akikimuto ti Krais ma aile aluiniwa lawe seilon. Amuto kewa hina lomuto ti Haeu ma hongoa kakai tel masiwi tapein ti xuxumuto.

**18** Amuto teka unaui seilon, kewa hina lomuto hani teka masiwi ti amuto. Hong usiwa kakailaha, kumahe mewenae na laha aile aluini amuto, tin hetekie na laha ahian.

**19** Se saun solian ti na amuto tolomike lioi ahiai saun ti teka masiwi nake amuto seilon ti Haeu.

**20** Na amuto aile ukek ien, hina salangawan ti sameniamuto ma Haeu amuke amuto. Tuahen na amuto kau kawatan ti lialui woumuto, tap salangawan ti sameniamuto.

**21** Amuto se teka kahikahi Krais, tetel i kauen kawatan ti hualiamuto ape Haeu pahan amuto usiwa soliai woun kalak na amuto tunahi moloan.

**22** Jises Krais tai aile wanen tenen na waliko lialun ma tin i tai pupuluti tel na seilon. (*Isa 53:9*)

**23** Ti teka seilon kak alui i, i kum kak halialu aliake laha. Ti i kau kawatan laha hani i, i kum kak hamatau laha ka i kahui aliake. I hani lioi tesol kawatan ien hani mini Haeu, tetellawe sawisawin ti paxai kolongenai woi seilon.

**24** Puki Jises Krais hani tupuan lehe i mat he kros ti kaui kawatan ti lialui woukaha. I aile ukek lehe kaha lioi xaxaweni saun tenen lialun ma kaha hana namilokaha ti ailei waliko tenen sawisawin. Nameniwa, Haeu haewiawen amuto nake Jises Krais uke totonamuto ti kaui kawatan.

**25** Kemuk amuto masin teka sipsip laha nahih mitaxia. Tuahen ti aope ie amuto tohea alia haniwen kapi Jises Krais tetel ngahatiamuto. I awawai namilomuto lehe waxy amuto hamalum hahitake nenein ti Haeu.

### 3

#### *Nauna hani teka hehin salawen*

**1** Tin masin amuto teka hehin, amuto paxai tioiwa ka amuto hahitake axoamuto. Ape na lato tahi kakai Haeu, aile tatalewa saun solian hani lato. I xoini kakaiamuto ti itiniae namilolato usiai aweisali Haeu.

**2** Na lato ningahi amuto puas usi kakai Haeu hetekie soliai woumuto, tin lato soh kakaian.

**3** Kum namiloi eliel hasoliai tanome tupuamuto nake tanomamuto kumahe i kola soliai leiloamuto. Kum aile hahakila tenen tenen hani ukumuto ma hahakea waliko tenen pate tuah masin gol he tinumuto. Kum soosoi maia tenen kahun pate lalap.

**4** Soliaiamuto wanen i ahuma ti soliai woumuto. Haeu namiloi ukek amuto hehin tuah na amuto aile aluini teka seilon liai ma teheni aliake amuto ti usiai namilon. Tenen saun ien se soliaiamuto wanen ti tap tahi lialuan.

**5** Lokon ti kuewen, teka hehin ti Haeu tin laha aile saun tenen ien ti kolai solian ti laha. Laha hina namil xoxoan ti Haeu ma laha hong usi axoalaha.

**6** Masin Sara, i hong usi kakai Abraham tel axoan ma aile hani i hanowi ka tel masiwi. Amuto kola ka amuto masin Sara na amuto aile waliko ti Haeu ukek sawisawin hetekie tap matauamuto kalak na axoamuto ma na seilon liai axi amuto kawatan.

### *Nauna hani teka wawan salawen*

**7** Tin masin teka wawan, amuto aile aluiniwa axoamuto. Namiloi tioiwa ka amuto pamu kuin ti lato. Aile hasoliawa axoamuto nake ati amuto uke tonain kapi Haeu ti tap tahi tapoan, tetenen i hani amuto ti lalape soliaian. Na amuto aile ukek ien, Haeu hong waxi kamekame ti amuto ti leili lotu.

### *Nauna hani hatesol kahikahi Krais*

**8** Tiliai nauna tetak, amuto hatesol kewa namilomuto teikawe, kolawa tatahan hani tel tel, he wawahenawa ti atemuto wanen ma namiloi kewak seilon liai pate tuah.

**9** Na teka seilon kak alui ma na aile halialu amuto, kum kahui aliliake. Aile hasolia haniwa

laha nake Haeu pahan amuto ailewa saun tenen ien. Ape i tin i kola soliaian hani amuto.

<sup>10</sup> Masin teik kakain he pepai Haeu i ukek,  
“Na pahamuto amukei kilan ngain solian  
    ma soliai totonamuto,  
kum kakak kakain lialun  
    ma kum pupuluti seilon.

<sup>11</sup> Saliniwa ailei saun lialun ape ailewa waliko  
    tenen solian.  
    Lawe puas elielawa hasoliai wasolamuto.

<sup>12</sup> Aile kewak ien nake Haeu tel Masiwi  
    lawe i ngahati teka seilon sawisawin  
    ma hong waxi lotu ti laha.

Tuahe lawe i puas pahoxai teka ailei saun lialun.”  
*(Ps 34:12-16)*

*Teka kahikahi Krais kau kawatan ti ailei saun  
solian hanowi i*

<sup>13</sup> Na amuto hik hawane ailei saun solian, kaie  
teka seilon aile halialu amuto?

<sup>14</sup> Tuahe na amuto kau moloan ma kawatan  
nake ti ailei waliko tenen solian, amuamua.  
Tanusik amuto. Kum namiloi hahalapa na seilon  
liai hamatau amuto. Kum maamata teteka uke  
laha aile halialu amuto.

<sup>15</sup> Ti atemuto wanen haxawawa axe Krais tel  
Masiwi ti amuto. Na teka seilon kamei amuto  
sale xoxoi namilomuto ti Krais, kewa namilomuto  
lawe i apepeas ti haxewaian.

<sup>16</sup> Tuahe aile hasoliawa ma hamalehua kakaia-  
muto hani laha. Kanipetiwa sale nanahiamuto  
lehe waxi namilomuto kum sului aliake amuto.  
Ape na laha kak saxuti amuto, laha tahunos ti laha  
paxaiwa soliai woumuto ti Krais.

<sup>17</sup> Nameniwa, na Haeu pahan kaha kau  
kawatan nake ti ailei saun solian, tenen ien i

pamu ewian ti na kaha kau kawatan nake ti lialui woukaha.

**18** Kum tataxini nake Krais tin i kauen lalape moloan. I mat ti kaui kawatan ti lialui woukaha ape matean tapai tehue. I tel sawisawin tapein i mat ukei totone teka seilon lialun lehe i hasolia wasolakaha seilon ma Haeu. Kalak teka seilon telei tupuan, Haeu xahateni aliake i ape tap tahi matean.

**19** Ape i kaxi ahuti kakaihan hani teteka Haeu akeni kongini laha atengi taun ti i hiniti lawe seilon.

**20** Ti kuewen wanen laha tale tehitolaha hani Haeu. I sohot lokon ti Haeu to mon atetengi na seilon towiahu ti lialui woulaha. Telok ien Noa tanomi tea waian lalap nake Haeu hauxa akah hutomiae xux. Mewenae tepanim tolu seilon soh hani leili tea waian ape lato kuosel ti tenen kawatan ien.

**21** Telok somui kan ien i kilami baptais ti kako uke aope ie ti awaiakako ti kawatan ti lialui woukako na kako kaxi ahuti tenen saun ien. Saun ti baptais kumahe ti xaxaweniai lolo he tinukako. Leilon ti kako uke baptais, kako kamei Haeu ti nuhi hauniakako ti lialui woukako. Imat ti baptais, kako masin seilon maten tuahe Haeu hamoiha aliakewen kako. I aile ukek nake i xahateniwen Jises Krais ti matean.

**22** Jises Krais i ape tone Haeu, i toto sai tepaun minan manau. Haeu hana i Masiwi ti teka engel spirit solian ma lawe spirit lialun.

## 4

*Woumuto kolawa ka amuto nati Haeu*

<sup>1</sup> Krais kau moloan ti i he tehu pon itan ie. Aile ape kum nonomuha kaui kawatan masin ti i kauen. Na amuto kau kawatan nake amuto kahikahi Krais, i kola ka amuto talewen tehitomuto hani saun lialun.

<sup>2</sup> Ape moxe ngainumuto he tehu pon itan ie, amuto kum usi lialui isiaiamuto, amuto usi namili Haeu.

<sup>3</sup> Imat ti amuto sohot kahikahi Krais, amuto aile hakilawen saun tenen ti teka laha kum tioi Haeu ailele. Laha is eliel waliko tenen lialun, sale sikisiki ti laha pate hienain wanen, lawe laha un taxitaxia ape laha amuke ailei saun tenen tenen ti pate lialun. Tin laha lotui waliko tenen kumahe Haeu, a saun tenen ien i halenge hawane Haeu.

<sup>4</sup> Laha nam tataxini ti amuto kum tuai laha ailei tesol waliko lialun ien ape laha kak halialu amuto.

<sup>5</sup> Tuuhe imuh laha tu ti sulusulu mateiwai Haeu, tetel i paxai kolongeni woi lawe seilon, teka moi-hin ma teka maten.

<sup>6</sup> Nake ti tetenen, teka kahikahi Krais kaxi ahutiwen meng solian ti Haeu hani teka aope ie laha maten. Kalak laha mat hanowi lawe seilon, hanawaialaha tap tahi matean masin hanawai Haeu.

<sup>7</sup> Tapoi tehu pon itan ie ape i xohiwen. Aile ape namilomuto kewa xewan ma tahiwa lialui isiaiamuto lehe i huali lotu ti amuto.

<sup>8</sup> Amuto he wawahenawa ti atemuto wanen. Saun tenen ien pate tuah. Na amuto waheni seilon liai amuto pon oxoxialaha ti kawatan ti waliko lialun laha aile hani amuto.

<sup>9</sup> Lawe amukewa waxi auniai seilon hani leili ingamuto.

<sup>10</sup> Haeu axiwen amuto anesoin ti ailei waliko

tenen tenen. Aile ape amuto hapuasa aluiniwa ti hualiai seilon lehe waxy i kola soliai Haeu.

<sup>11</sup> Na amuto hina anesoin ti ailei kakain solian, hapuasawa ti kaxi ahutiai kakai Haeu. Na amuto huali teka seilon liai, hani hatapoa kuimuto ti Haeu axiwen amuto lehe laha sameni i nake ti waliko Jises Krais aile haniwen laha. Haeu i tetel tuah wanen ma pate poh lian tehue. Salan wanen.

*Teka kahikahi Krais kum salia ti kaui kawatan*

<sup>12</sup> Teka soliai akikik ti Krais, kum ong tataxini na kawatan tunahi amuto. I tohongi xoxoi namilomuto ti Krais. Kum namiloi ukekek waliko ien ala i kum tunahi amuto.

<sup>13</sup> Amuamua nake i aile amuto tuai Krais ti kaui kawatan. Ape tataen ti lawe seilon paxai tioiwa lalape masiwian, amuam ti amuto lap ahe.

<sup>14</sup> Na teka seilon kak halialu amuto nake amuto kahikahi Krais, amuamua nake Spirit ti Haeu kapimuto. I tel pate tuah.

<sup>15</sup> Tuahe kumahe nga kakak kawatan tetenen laha axi amuto na amuto telei seilon, amuto xuxuina ma na amuto tua nihini amuto hani soxiao seilon liai.

<sup>16</sup> Nga kakak kawatan tetenen laha axi amuto nake amuto kahikahi Krais. Na i sohot hani amuto, kum hihienake. Kak kemulik haniwa Haeu ti laha axai amuto kahikahi Krais.

<sup>17</sup> Haeu hutuiwen hinitiai seilon. Imat, i paxai kolongenimu woukako teka seilon tetan. Ape na i aile hani kako teka natun, lalapai kawatan i axi teka laha kum hong usi meng solian tetan.

<sup>18</sup> Masin ti leili pepai Haeu i ukek,  
“Na teka seilon sawisawin kau kawatan  
imat ti Haeu awai tinami laha ti lawe waliko  
lialun,

pamu lialuan kawatan ti i tunahi  
 teka laha kum soh ti Haeu,  
 teteka laha weli ailei saun lialun." *(Prov 11:31)*

<sup>19</sup> Aile ape na Haeu pahan amuto kau kawatan, aile tatalewa waliko tenen solian. Hana hatapoa amuto hahitake ngangahat ti Haeu nake puki i tanomi amuto. Na amuto hina namil xoxoan ti soliai ngangahat tetan, amuto kum nam tahane aliake.

## 5

*Nauna hani teka masiwi, teka wawan uluha ma hatesol kahikahi Krais*

<sup>1</sup> Nga ape hina kakain hani amuto tesol masiwi ti teka kahikahi Krais. Nga tin masiwi masin amuto ma ti puki pulak nga paxaiwen ti Krais kau moloan. Ape taen i aliama, nga tuai hawane i ti lalape pohen ma soliaian ti lawe seilon paxai tioi imuh.

<sup>2</sup> Pahak amuto ngahati aluiniwa teka seilon ti Haeu kapimuto. Lawe waheniwa ailei tenen puasain ien masin ti Haeu pahan amuto ailewa. Kum pupuas tuahe ti ukei kahumuto, puas kolawa ka amuto unaui Haeu wanen.

<sup>3</sup> Kum tua hone lulungei teteka Haeu hana hahitake ngangahat ti amuto. Kolawa soliai woumuto lehe waxi lato aile usi.

<sup>4</sup> Na amuto aile ukek ien, Haeu hani kahumuto waliko tenen pate solian ti tap tahi lialuan, tataen ti Jises Krais tel ngahat tapein aliama.

<sup>5</sup> Teka wawan uluha, hong usiwa kakai teka masiwi ti amuto. Ape amuto hatesol kahikahi Krais, ti amuto ailele puasain tenen tenen, lawe

paxai tioiwa ka seilon liai pate tuah. Ti leili pepai Haeu i ukek,

“Haeu lawe i teheni teka seilon laha haxawa ali-  
ake laha,  
ape lawe i aile kola soliaian hani teka laha  
paxai tioi  
ka seilon liai pate tuah.”

*(Prov 3:34)*

<sup>6</sup> Aile ape teheniwa amuto hani hahitake nganga-  
hat ti Haeu tel pohen wanen, lehe i haxawa amuto,  
taun ti puki i kilamiwen.

<sup>7</sup> Kum namiloi hahakila tenen na waliko. Lioi  
haniwa Haeu nake i tel ngahat solian ti amuto.

<sup>8</sup> Kewa namilomuto xewan ma kanipetiwa Sa-  
tan tel pahoxaiamuto. I masin tok oha lengean na  
i sasaxax teleiai anan.

<sup>9</sup> Haxoxoa namilomuto ti Haeu lehe waxi amuto  
pon pahoiai Satan. Nameniwa, kumahe mewenae  
amuto, teka akikimuto ti Krais tesol tesol tin laha  
kau kawatan nake laha seilon ti Haeu.

<sup>10</sup> Tuahe malehe lalape solian ti Haeu. Pahan  
i hani amuto solian tetenen tap tahi tapoan nake  
amuto pakata xox kapi Jises Krais. Aile ape muhi  
kaui kawatan, Haeu haewia aliake amuto, hakui  
amuto ma haxoxo namilomuto lehe waxi amuto  
soh hamalum hawane ti soliai ngahat tetan.

<sup>11</sup> I tel Masiwi tapein pate pohen lian tehue.  
Salan wanen.

### *Tilai kakai Pita*

<sup>12</sup> Nga tatai teik pas ie hetekie huhual ti Sailas,  
tel akikikako ti Krais. I tel unaui Haeu wanen.  
Kilan tutuen kakain ti i tapai nga hone amuto  
tuahe nga tua tai kemuk ie ti hakuiamuto. Nga  
hone hawane amuto, lawe waliko nga tatai sale

lalape soliai Haeu se salan wanen. Aile ape tu xox tatalewa tetan kalak na kawatan tunahi amuto.

<sup>13</sup> Amuam ti teka kahikahi Krais ie haniwa amuto. Lato toto tesol ti kumahe xuxulato wanen. Masin amuto, Haeu kilamiwen lato seilon tetan. Amuam ti Mak tin haniwa amuto, tetel i masin natuk wanen.

<sup>14</sup> Kolawa amuam hetekie wawahen haniwa tel tel ti amuto.

Nga kamei Haeu ti hatona hasoliai tiamuto hatesol, teka seilon ti Krais.

## KAKAI HAEU

**The New Testament in the Seimat language, The  
Ninigo Islands, Manus Province, Papua New Guinea  
Nupela Testamen long tok ples Seimat, Manus Provins,  
Niugini**

copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

---

PDF generated using Haiola and XeLaTeX on 28 Dec 2024 from source files dated 31 Aug 2023

9fa179b2-dd20-5dbd-9745-1fb6d5f9b415